

# **Ecloca**

Theodulus

Æthiopum terras iam fervida torruit æstas,  
 In Cancro solis dum volvitur aureus axis,  
 Compuleratque suas tiliæ sub amœna capellas  
 Natus ab Athenis pastor cognomine Pseustis,  
 Pellis pantheræ corpus cui textit utrimque  
 Discolor et rigidas perflavit fistula buccas  
 Emittens sonitum per mille foramina vocum.  
 Ad fontem iuxta pascebat oves Alithia,  
 Virgo decora nimis David de semine regis,  
 Cuius habens citharam fluvii percussit ad undam. 10  
 Substiterat fluvius tanta dulcedine captus  
 Auscultando quasi modulantis carmina plectri  
 Ipseque balantum grex obliviscitur esum.  
 Non tulerat Pseustis, sed motus felle doloris  
 Litoris alterius proclamat ab aggere tutus:  
 «Cur, Alithia, canis rebus stultissima mutis?  
 Si iuvat, ut vincas, mecum certare potestas:  
 Fistula nostra tuum cedit, si vincis, in usum;  
 Victa dabis citharam; legem cœamus in æquam». 20  
 Illa refert: «Nec dicta movent nec præmia mulcent  
 Me tua nunc adeo, quia vulnere mordeor uno:  
 Quo res cumque cadit, testis nisi sedulus assit,  
 Si victus fueris, non me vicisse fateris.  
 Sed quia mutari nescit sententia cœpti,  
 En adaquare gregem, simul et relevare calorem  
 Nostra venit Fronesis: sedeat pro iudice nobis».  
 Pseustis ad hæc: «Video quod eam sors obtulit ultro.  
 Huc ades, o Fronesi! nam sufficit hora diei,  
 Ut tua iam nostro postponas seria ludo». 30  
 Tunc mater Fronesis: «Adaquato me grege quamvis  
 Accelerare domum iussisset uterque parentum  
 Nec dubitem pœnas, si quicquam tardo, paratas,  
 Læta feram talis præsumens gaudia litis.  
 Perge prior, Pseusti, quia masculus; illa sequaci  
 & Aeligquabit studio. Sit tetras in ordine vestro.  
 Pitagoræ numerus. Sol augeat, obsecro, tempus.»

## PSEUSTIS

Primus Cretæis venit Saturnus ab oris  
 Aurea per cunctas disponens sæcula terras;  
 Nullus ei genitor nec quisquam tempore maior;  
 Ipso gaudet avo superum generosa propago. 40

## ALITHIA

Incola primus homo fuit in viridi paradiso.  
 Coniuge vipereum donec suadente venenum

Hausit eo cunctis miscendo pocula mortis:  
Sentit adhuc proles, quod commiserere parentes.

#### PSEUSTIS

Splendorem tanti non passus Iuppiter auri  
Expulit illatis patrem crudeliter armis:  
Decolor argento mundi successit imago  
Et iam primatum dedit illi curia divum.

#### ALITHIA

Exulat eiectus de sede pia protoplastus           50  
Ac cinis in cinerem naturæ mutat honorem.  
Ne tamen æterni temeremur stipite pomi,  
Flammeus ante fores vetat ensis adire volentes.

#### PSEUSTIS

Egregio Cecropi debetur causa litandi:  
Ille bovis primo rimatur viscera ferro.  
Sacra Iovi statuit, quæ posteritas celebravit;  
Condidit Athenas; adiuvit nomine Pallas.

#### ALITHIA

Immolat ante Deum Cain de semine frugum;  
Frater Abel iustus dedit acceptabile munus  
Sponte ferens agnum - talis decet hostia Christum -;  
Ense cadit fratris; loquitur post funera mortis.           60

#### PSEUSTIS

Licaon Arcas cælestes provocat iras,  
Quando suas ædes invasit Iuppiter hospes,  
Fallere temptando numen Iovis; exuit ergo  
Corpus et os hominis; sævit lupus asper in arvis.

#### ALITHIA

Enoc, iustitiæ polluto cultor in orbe,  
Raptus de terra nulli comparuit ultra,

Iudicis adventum fidens athleta secundum;  
Leviathan contra socio præcedet Helia.

#### PSEUSTIS

Venit ab Oceano submergens cuncta vorago,  
Tellus cessit aquæ, periit quod vixerat omne; 70  
Deucalion homines, præter quem nemo superstes,  
Cum Pirra iactis renovavit coniuge saxis.

#### ALITHIA

Ultio digna Dei fontes dirupit abissi  
Octavum Nœ servans in partibtis arcæ;  
Amodo ne talem patiantur sæcula cladem,  
Visibus humanis per nubila panditur Iris.

#### PSEUSTIS

Idæos lepores puer exagitat Ganimedes,  
Quem Iovis arreptum devexit in æthera sursum  
Armiger; ablato divum concesserat ordo  
Nomen pincernæ, quod possedit prius Hebe. 80

#### ALITHIA

Corvum perfidiæ dampnant animalia quæque,  
Nuntius inclusis quia noluit esse salutis;  
Ore columba suo ramum viridantibus intro  
Detulerat foliis, superest Armenia testis.

#### PSEUSTIS

Surrexere viri terra genitrice creati,  
Pellere cælicolas fuit omnibus una voluntas;  
Mons cumulat montem, sed totum Iuppiter hostem  
Fulmine deiectum Vulcani trusit in antrum.

#### ALITHIA

Posteritas Adæ summa Babilonis in arce  
Turrim construxit, quæ cælum tangere possit. 90

Excitat ira Deum: confusio fit labiorum,  
Disperguntur ibi, nomen non excidit urbi.

#### PSEUSTIS

Fulmina Ciclopes Iovis imperio fabricantes  
Pæone percusso morti decrevit Apollo;  
Mox deitate sua superum spoliatus in ira  
Admeti curam pecoris suscepit agendam.

#### ALITHIA

Limite iussus Abram patrio discedere Sarram  
Assumpsit sine spe sobolis sibi concipiendæ;  
Tandem confectis ætate creatur herilis  
Filius et lactat, sua quam natura gravabat. 100

#### PSEUSTIS

Dædalus aptatis liquidum secat æra pennis;  
Filius insequitur, fragilis sed cera liquatur  
Et cadit in pelagus, gemuit sub pondere fluctus.  
Ille sui compos brumales attigit Arctos.

#### ALITHIA

Heredis forma non est motus patriarcha,  
Quin mactaret eum, nisi vox emissa deorsum  
Parcere iussisset; rapitur, qui cornibus hæret  
In dumis, aries; sequitur patrem sua proles.

#### PSEUSTIS

Phillis amore gravi Demofontis capta superbi  
Mutat flebiliter rigidum pro corpore suber; 110  
Ille reversus eo truncum rigat ore supino,  
Occurrit foliis, ceu senserit oscula, Phillis.

#### ALITHIA

In cinerem Sodomas solvens divina potestas  
Ob pactum patruum, Loth parcere cogitat uni;

Servat eum Segor, sed perfida vertitur uxor  
In salis effigem, lambunt animalia caudem.

#### PSEUSTIS

Argolicas contra bellans acies Citharea  
Titidæ manibus grave pertulerat dea vulnus;  
Deplorant socii commissa ducis furiosi,  
Nam facti volucres acuunt pro dentibus ungues. 120

#### ALITHIA

Congressus Domino Iacob luctamine longo  
Nervos amisit femoris, dum cedere nescit;  
Quam plagam veluti gemat evenisse parenti,  
Non comedit nervum successio tota nepotum.

#### PSEUSTIS

Ipolitus sæva perit accusante noverca  
Discerptus bigis focas agitantibus undis.  
Dampna pudicitiae non pertulit ira Dianæ:  
Ipolitum revocat; modo nomine Virbius extat.

#### ALITHIA

Venditus in servum Ioseph livore suorum  
Ardentis dominæ dum spernit vota minasque, 130  
Addictus vinclis discussit somnia regis  
Et subduntur ei totius regna Canopi.

#### PSEUSTIS

Græcorum primus vestigat grammata Cadmus  
Postquam sevit humi dentes septemplex ydri;  
Quos necdum fato mersit fortuna sinistro:  
Ne patiat idem, se sibilat esse draconem.

#### ALITHIA

Raptus aquis Moyses magicas everterat artes,  
Omnis eum regio timuit circumflua Nilo;

Eduxit cives, submersit fluctibus hostes,  
Memphios exitium testatur adhuc mare rubrum. 140

#### PSEUSTIS

Summa Iovis calidas Luropæ forma medullas  
Movit et in taurum deitatis vertit amictum:  
Virgine stuprata non passus Agenoris arma  
Nomen donat ei, quod habet pars tertia mundi.

#### ALITHIA

Insignem vitulum conflaverat ignis et aurum  
Ex Aaron digitis; insanit turba rebellis:  
Stirps Levi postquam Domini compescuit iram,  
pontificalis ei datur infula iure perhenni.

#### PSEUSTIS

Uxoris stimulos luis, Aimpfiaræ sacerdos,  
Pectore flagrantis dum splendet baca monilis: 150  
Haurit te subitus specus ex Acheronte profundo;  
Mactat eam tenebris orbatae dextera prolis.

#### ALITHIA

Fata Choræ miseri parere monent meliori:  
Accipit infernus, quem devorat arida tellus;  
Sed Deus occulte Moysen sepeliverat ipse  
Nec cuiquam hominum dedit indagare sepulchrum.

#### PSEUSTIS

Ventilat æstro decoratam cornibus Io  
Iuno ferox et ei tutelam deputat Argi:  
Mugit pro verbis horrentibus obsita sætis,  
Donec in effigiem rediit mutata priorem. 160

#### ALITHIA

Offensus Balaam calcaribus urget asellam;  
Angelus occurrit, pecudem qui stare cœgit.

Res horrenda nimis! Laxatur vox animalis,  
Quæ consuevit homo producere verba, loquendo.

#### PSEUSTIS

Sufficeret thalamis ut Iuppiter Amphitrionis,  
Noctis opem placidæ geminavit candida Phœbe;  
Protinus Alcmena licet indignante noverca  
Editus Alcides immissos strangulat angues.

#### ALITHIA

Victrici populo ne quondam vivida bello  
Deficeret virtus Gabaon ad prælia, Phœbus 170  
Imperio Iosuaë stabat defixus in arce:  
Quæ sanctæ fidei sint præmia, discite cuncti.

#### PSEUSTIS

Alcidæ vigilem spoliavit clava draconem;  
Gerionis pompam rapit et consumpserat ydram;  
Cacus cessit ei, succumbit ianitor Orci:  
Incendit demum pælex Deianira superbum.

#### ALITHIA

Samson exuviis indutus niembra leonis  
Sternit mille viros, devastat vulpibus agros,  
Urbis claustra tulit, nervorum vincula rupit:  
Fraude sua tandem præcidit Dalida crinem. 180

#### PSEUSTIS

Nomina mille deum vatem defendite vestrum,  
Qui colitis Ditem, qui stelliferam regionem,  
Qui partes mundi, qui stagna sonantis abissi:  
Nomina mille deum vatem defendite vestrum.

#### ALITHIA

Par idemque Deus, maiestas, gloria, virtus,  
Quod fuit, est et erit, te collaudat, tibi servit,



Cui tres personæ, tria nomina; tu sine fine,  
Tu sine principio nos vincere falsa iubeto.

#### PSEUSTIS

Certavere sequi demissis frondibus orni  
Orphea per silvas modulantem carminis odas; 190  
Euridicen motis, qui regna tenent Acherontis,  
Condicione gravi iussit Proserpina reddi.

#### ALITHIA

Ne regis corpus vexaret prædo malignus,  
Cordarum musa puer adiuvit citharista;  
Cuius erat studium pelles tondere bidentum,  
Temporis articulo successit dextera scepro.

#### PSEUSTIS

Herbarum succos tractans Cillenius heros  
Exortes lucis virga revocavit ab umbris,  
Arte potens tali, credas ut cuncta fateri,  
Quod natum Maiaë lactavit mamma novercæ. 200

#### ALITHIA

Omnipotens Ididæ poscenti dona Sophiæ  
Annuit in tantum, naturæ vincat ut usum  
Præditus ingenio decoravit mœnia tempio:  
Confertum gazis evertit amor muliebris.

#### PSEUSTIS

Gnosia cum raros quateret Dodona racemos,  
Mater larga Ceres miserata fame pereuntes  
Triptoleum mundo misit serpente ministro,  
Qui primum terræ spem demonstravit aristæ.

#### ALITHIA

Nubes æthereas precibus constrinxit Helias,  
Gramina nulla super madidus stillaret ut imber; 210

Pulsus humo patria bibit a torrente propheta;  
Suffecit pastus, quem detulit assecla corvus.

#### PSEUSTIS

Gorgonis effigie mortalis vertitur ide,  
Nam qui viderunt, lapides quasi diriguerunt.  
Bellerofon monstro cum Palladis arte perempto  
Comit equi pennas et se dimittit in auras.

#### ALITHIA

Effugium terræ Iezabel obstruxit Heliaë,  
Cum distractus equis apparuit igneus axis;  
Flammea, quæ venit, vatem quadriga levavit,  
Spiritus heredi geminatur amore magistri. 220

#### PSEUSTIS

Tithonum thalamis dignans Aurora superbis  
Augendo vitam mutavit in usque cicadam;  
Extinctum Troiæ sepelivit Mennona longæ,  
Annua cuius aves venerantur festa frequentes.

#### ALITHIA

Addictus morti faciem rigat imbre salubri  
Rex Ezechias et fati distulit horas;  
Ne dubitaret item se promeruisse salutem,  
Lora sui cursus retro sol flexit anhelus.

#### PSEUSTIS

Excedit laudes hominum, qui primus agones  
Instituit fieri sub vertice montis Olympi: 230  
Ardua victrices obnubit laurea crines,  
Ducit pompa domum, sequitur confusio victum.

#### ALITHIA

Casum Iosiaë deflebant oppida ludæ:  
Magedo campos fons detestatur et arbos;

Mærent morte sua leges et nobile Pascha,  
Omnis adhuc ætas, sed præcipue Ieremias.

#### PSEUSTIS

Dum tonitrus simulat Salmon et fulmina quassat  
Lampade terrifica percurrens Elidis arva,  
In medio pontis non passus Iuppiter hostis  
Comparis arma sui deiecerat igne minaci. 240

#### ALITHIA

Inscius esse Deum nisi se rex Assiriorum  
Rores et pluvias septem toleravit aristas,  
Bestia factus homo: cunctis suadet in illo,  
Discant naturæ contenti viribus esse.

#### PSEUSTIS

Quadrupedes Phœbi quæ cogit causa morari?  
Experientur item Phætontis sæcula cladem.  
Quid, vesper, cessas? Saturarunt prata capellas,  
Ruminat omne pecus, nescit procedere Phœbus.

#### ALITHIA

Visibus humanis famulantur lumina solis  
Fixa tenore suo, quem prima creavit origo. 250  
Cur noctem revocas? Quid vis? Me fallere temptas;  
Quod te destituunt vires, suspiria produunt.

#### PSEUSTIS

Pignoris egregii speciem metuens violari  
Acrisius seris obstruxit limina turris:  
Et iam tecta super pluviam stillavit adulter  
Virginis in gremium: Danæm corruperat aurum.

#### ALITHIA

In caveam missum non attigit ira leonum,  
Quamvis passa famem, tutante Deo Daniele,

Signatis foribus cui prandia detulit intus  
Abacuc uno transvectus regna capillo. 260

#### PSEUSTIS

Thura cremate focis, si quos servare velitis  
Fetus incolumes: iubet hoc Latonia proles.  
Ex humero Triviæ dependent spicula mille  
Cum totidem nervis, Niobæ vindicta loquacis.

#### ALITHIA

Presbiteris flammas nec longi temporis ætas  
Nec tanti sexus potuit restringere virtus;  
Sed districta licet mortis sibi fata videret,  
Quam natura dedit legem, Susanna subegit.

#### PSEUSTIS

Mens robusta viri levitate cadit muliebri:  
Ypomanes tractant, gustu sua membra cruentant. 270  
Femina quid possit, Terei domus aspera novit,  
Scit Medea suis infesta clade peremptis.

#### ALITHIA

&Aeligra ne fedent, isthæc convicia, cessent.  
Femineas vires expavit dux Olofernes  
Insignis viduæ vesano captus amore:  
Deflent Assiri, quod crediderit mulieri.

#### PSEUSTIS

Ardet Scilla thoros - torquebat viscera Minos -,  
Purpureo veterem spoliavit crine parentem:  
Sed contempta viro plumas capit incita rostro,  
Vexat ubique pater, curvis sonat unguibus ær. 280

#### ALITHIA

Coniugis offensum tumido sermone tirannum  
Persidis et Mediæ species commovit Edissæ:

In solio Vasti meruit captiva locari  
Civibus intentam removens a principe plagam.

PSEUSTIS

Prata virent, silvæ frondent, nunc omnia rident:  
Huc Elicon Musas, huc, Protheu, mitte Napæas;  
Assint præcipue, si curant florida Tempe.  
Quos in distichii serie complecteris, Enni.

ALITHIA

Erroris causas finxit timor atque voluptas:  
Singula si baratro sunt, numina singula cælo, 290  
Si sua mundus habet, si pontus, quid modo restet  
Ni, quot membra tenes, tot confiteare penates?

PSEUSTIS

Sponte sua tauri cupiunt ad tecta reverti:  
Vesper oves cithiso, capras depellit ab ulmo;  
Ni matura redis, lupus insidiabitur agnis.  
Cede, dies, cælo, quia nescit cedere virgo.

ALITHIA

Si vos terret, oves, lupus ad caulas redeuntis,  
Cornibus elatis illum, mea cura, petatis,  
Quem sine fraude pius paschalis vicerat Agnus. 300  
Fige, dies, cursum, ne perdat virgo triumphum.

PSEUSTIS

Triste mari vectis Helenæ respectus in astris,  
Frugibus ærugo, serpentum sibilus agro;  
Hortos talpa fodit, digitos urtica perurit:  
Omnia quis divum voluit configere tantum?

ALITHIA

Dulce viro mulier, pratis arentibus imber,  
Mandragoræ sterili, fons agricolæ sitiendi:

Præcellit cunctis, animæ velamina carnis  
Lxuerint postquam, placari Iudicis iram.

PSEUSTIS

Quænam cælicolas avertit dira voluptas?  
Zodiaci numquid loca maximus ordo reliquit? 310  
Aut stertunt omnes aut tractant pocula Lethes.  
Cede, dies, cælo, quia nescit cedere virgo.

ALITHIA

Obtutu vigili curat fastigia cæli,  
Quicquid nutrit humus, quicquid producit abissus,  
Nec somnum novit qui Verbo cuncta creavit.  
Fige dies, cursum, ne perdat virgo triumphum.

PSEUSTIS

Dic mihi: dum tristes adiit Proserpina sedes 320  
Lege data matri, si vellet nata reverti.  
Gustum perfidiæ quis primum prodidit ore?  
Dic et Troianum lauderis scire secretum.

ALITHIA

Cum pelagus mundo subsidat, mundus Olimpo,  
In medio semper consistat pendulus ær,  
Dic: ubi terra levem cæli supereminet axem?  
Et te posse Dei tetragrammaton annuo fari.

PSEUSTIS

Ista suis hodie si prevalet artibus in me,  
Dum cessit Mopso, Calcantis more dolebo,  
Fraude puellari sed non patiar superari:  
Millesies repetam, nisi subtrahat Hesperus horam.

ALITHIA

Nunc utinam Tales, falsorum fictor, adesses!  
Quatuor imprimis evangelicæ rationis 330

Nitar codicibus, nostrum de virgine corpus  
Ut Deus accepit, nec me labor iste gravabit.

#### PSEUSTIS

Egregiam sobolem cui per Stilbontis amorem  
Vi superum magna sociasti -teste Capella-,  
Obsecro te, Fronesi, iubeas reticere sorori:  
Quo tendit, cedo nec me cessisse negabo.

#### FRONESIS

Mortales cuncti quod contendunt adipisci  
Nec, si perficiant, vitæ discrimina curant,  
Ex insperato dominus tibi contulit ultro:  
Ut cessare velis devictus supplicat hostis.           340  
Treicius vates commovit pectine Manes,  
Te moveant lacrimæ; iam tollit cornua Phœbe;  
Sol petit Oceanum. frigus succedit opacum:  
Desine quod restat, ne desperatio lædat.

Tunc Alithia Deo reddens pia carmina plectro  
Hoste suo victo cœpit modulare benigno:  
Alme Deus, triplex, ast omnipotens, pie, simplex,  
Qui cælum, terras, mare, tartara rite gubernas  
Quique regis cuncta propria virtute sub una,  
Erige subiectos cunctos tibi, sterne superbos:           350  
Cui sit laus semper, virtus, pax, gloria perpes,  
Quem decet æternum regnum sine fine per ævum.